

摘藻堂四庫全書薈要

集部

欽定四庫全書薈要

御定歷代題畫詩類卷十一目錄

山水類

戲題王宰畫山水圖歌

唐杜甫

陳式水墨山水

唐方干

盧卓山人畫水

唐方干

題稚川山水

唐戴叔倫

題羅稚川畫卷

元陳旅

題羅稚川小景

元劉詵

題彭宜遠所藏羅稚川山水樓閣圖

元劉詵

題稚川山水

元丁復

摩詰畫

宋黃庭堅

觀王生所藏王維畫

明袁凱

王右丞山水真蹟歌

明祝允明

次韻子由書王晉卿畫山水

宋蘇軾二首

題王晉卿畫後

宋蘇軾

題王詵都尉畫山水橫卷 宋蘇轍三首

王都尉山水 元元好問

王晉卿畫 元吳鎮

題王晉卿畫 元華幼武

學士院燕侍郎畫圖 宋王安石

燕侍郎山水 宋王安石

題燕肅畫卷 元仇遠

燕文貴山水 元袁桷

觀燕肅畫

元唐肅四首

題燕肅山水卷

明冷謙

題華光畫山水

宋黃庭堅二首

題華光長老畫

宋韓駒二首

書郭熙橫卷

宋蘇轍

郭熙山水卷

元劉因

郭熙山水畫卷

元張庸

郭熙山水小景

明張適

題米元暉畫

宋朱子

米元暉山水

元牟獻

有人示山水畫卷以為元暉作求詩

元戴表元

題米元暉山水

元趙孟頫

題米元暉山水

元吳澄

題金德原所藏元暉小景

元黃潛

米元暉畫卷

元吳鎮

題米南宮畫

元鄭韶

題米元暉江山小景

元趙汾

元暉山

元郭昇

題米元暉墨山

元于立

題米元暉畫山水

元陸友

題元暉山水

元張天英

畫山水歌題米元暉卷

元張天英

題宋子章效米元暉山水圖

明劉基

題米元暉山水

明張以寧

題米老山水

明王僊

題米南宮水墨圖

明吳寬

題畫米家山水

明李日華三首

小米山水

明祝允明

倣米元章筆意因題

明董其昌二首

米友仁畫卷

元吳鎮

范寬山水

元張翥

題魯彥康所藏范寬山水手卷

元錢惟善

范寬畫卷山水

元牟魯

范寬畫卷山水

元劉元佐

范寬畫卷山水

元王蒙

范寬畫卷山水

元葉廣居

奉題朱澤民先生畫山水圖

元李祁

題朱澤民畫山水

元黃鎮成

朱澤民山水

元鄭元祐二首

題朱澤民山水

元陳基

題朱澤民山水 元 郊韶

朱澤民畫 明 蘇伯衡

朱澤民山水歌 明 虞堪

觀朱澤民所畫山水有感 明 袁凱

朱澤民山水 明 沈周

題湯溪胡氏藏朱澤民山水大幅 明 吳寬

欽定四庫全書薈要卷一萬九千二百十九

集部

御定歷代題畫詩類卷十一

山水類

戲題王宰畫山水圖歌

唐杜甫

十日畫一水五日畫一石能事不受相促迫王宰始肯
留真跡壯哉崑崙方壺圖掛君高堂之素壁巴陵洞庭
日本東赤岸水與銀河通中有雲氣隨飛龍舟人漁子
入浦潏山木盡亞洪濤風尤工遠勢古莫比咫尺應須

論萬里馬得并州快剪刀翦取吳松半江水

陳式水墨山水

唐方干

造化有功力平分歸筆端溪如水後聽山似燒來看立

意雪髯

一作霜髯

出支頤煙汗

一作汁

乾世間從爾後應覺致

名難

盧卓山人畫水

唐方干

常聞畫石不畫水畫水至難君得名海色未將藍汁染
筆鋒猶傍土堆行散吞高下應無岸斜感東南勢欲傾

坐久神迷不能決却疑身在小蓬瀛

題稚川山水

唐戴叔倫

松下茅亭五月涼汀沙雲樹晚蒼蒼行人無限秋風思
隔水青山似故鄉

題羅稚川畫卷

元陳旅

雨氣通林壑江光動野航道人巖下去茅屋樹邊涼斷
岸入秋水遠山留夕陽登臨莫作賦游子未還鄉

題羅稚川小景

元劉詵

遠洲連岡近洲平高樹稀葉低樹青長溪浸日流無聲
中有數葉漁舟橫誰家飛軒接水亭沙邊客至扶杖迎
江邨頗類浣花里人品兼似陶淵明

題彭宜遠所藏羅稚川山水樓閣圖

元劉詵

平沙蒼蒼鳥未歸煙邨四合高復低漁翁兩兩青蓑衣
賣魚直上長楊堤千峰萬峰何崔嵬朽枝瞰水忽倒垂
倦驢向橋欲渡疑後有羸僕勢若追却疑詩人獨尋詩

舍鞍先濟何所之飛樓縹緲山之西中有美人長鬚蒼
凭闌相對知為誰豈非海上喬與期宮中琪樹秋離離
髣髴疑有香風吹吾聞蓬萊有此地流水落花隔人世
便當賸買青芒屨小向是間住千歲

題稚川山水

元丁復

江光如空山在天好風佳日散晴煙綠陰成蓋屋樹連
野橋楊柳亦娟娟擔簦之子何促速況有荷杖當我前
茅堂獨坐豈待客或者傲兀忘流年又疑浣花溪上叟

索句未得掩兩肘對樹不語胡為然將非得詩不得酒
好客不來兩何有耐可有酒有客無詩篇出門諒不可
天地烏用我乃不使之老為農耕種南山田陶公秫熟
五十畝往往為酒愁無錢不如兩漁翁靜釣春江船有
時掣得十尺魚紫鱗耀日錦色鮮賣魚買酒自可醉仰
歌明月披蓑眠金陵美酒斗十千老客抱甕雙檜邊長
日渴吻流無涎六代江山眼中好六帝池臺沒荒草五
錦驄嘶滿道歸來輒向蓬萊島蓬萊島海上仙凝波倒

影髮正玄百年未信人能老大笑長呼羅稚川

摩詰畫

宋黃庭堅

丹青王右轄詩句妙九州物外常獨往人間無所求袖
手南山雨輞川桑柘秋胸中有佳處涇渭看同流

觀王生所藏王維畫

明袁凱

右丞小景樹參差我有林塘實似之日日欲歸還踴躍
時時借看解愁思恨無黃鵠高飛去獨奈沙鷗靜不移
明日江頭候春水典衣沽酒待篙師

王右丞山水真蹟歌

明祝允明

生煙漠漠中有樹樹外田家幾家住重巒複塢隨不斷
茅舍時時若菌附兩人並向魚梁涉一鳥遙從翠微度
行雲澹映荒水陂似有斜陽帶微暉傍篠白沙明青林
涵沉霧乍明乍晦景萬變想當夏盡秋初處石牆短綠
隈隈水淺縈迴寬平一畝敞層屋板扉犬臥無人開書
堂樹深晝寂寂主人應是王摩詰清晨騎鹿看田出行
過柴泝日向夕會招高適與裴迪共賦輞川佳事畢圖

成興盡詩未筆

次韻子由書王晉卿畫山水 二首 宋蘇軾

老去君空見畫夢中我亦曾遊桃花縱落誰見水到人
間伏流

山人昔與雲俱出俗駕今隨水不回賴我胸中有佳處
一尊時對畫圖開

題王晉卿畫後

宋蘇軾

醜石半蹲山下虎長松倒臥水中龍試君眼力看多少

數到雲峰第幾重

題王詵都尉畫山水橫卷

三首

宋

蘇轍

摩詰本詞客亦自名畫師平生出入輞川上鳥飛魚泳
嫌人知山光盎盎著睂睫水聲活活流肝脾行吟坐詠
皆自見飄然不作世俗詞高情不盡落縑素連峰絕澗
開重帷百年流落存一二錦囊玉軸酬不訾誰令食肉
貴公子不學父祖驅熊羆細瑣淨几讀文史落筆璀璨
傳新詩青山長江豈君事一揮水墨光淋漓手中五尺

小橫卷天末萬里分毫釐謫官南出止均穎此心通達
無不之歸來纏裹任紉綺天馬性在終難羈人言摩詰
是前世欲比顧老疑不癡桓公崔公不可與但可與我
寬衰遲

憐君將帥雖有種多君智慧初無師篇章俊發已可駭
丹青妙絕當誰知自言五色苦亂目況乃旨酒長傷脾
手狂但可時弄筆口病未免多微詞歌鍾一散任池館
幅巾靜坐空書帷偶從禪老得其趣此身不足非財訾

世間翻覆岸為谷，猛獸相食虎與羆。
逝將得意比春夢，獨取妙語傳新詩。
眼看官釀瀉酥酪，未與邨酒分醇醪。
解鞍駿馬空伏櫪，寄書黃狗閒生釐。
江山平日偶有得，不自圖寫渾忘之。
臨牕展卷聊自適，盤礴豈復冠裳羈。
欲乘漁艇發吾興，願入野寺嗟兒癡。
行纏布襪雖已具，山中父老應嫌遲。

我昔得罪遷南夷，性命頃刻存篙師。
風吹波蕩到官舍，號呼誰復相聞知。
小園畜蟻防橘蠹，空庭養蜂收蜜脾。

讀書一生空自笑賣鹽竟日那復詞城中清溪可濯漱
城上連峰堪幕帷十千薄俸聊足用魚多米賤憂無訾
東坡居士最岑寂岷然深藪見孤羆坐隅止鵬偶成賦
槃中食藁時作詩憐君富貴可炙手一時出走羞啜醢
澤傍憔悴凡幾歲胸中芥蒂無一釐江山別來今久矣
不獨能言能畫之同朝執手不容久笑我野馬方受羈
袖中短卷墨猶濕傍人笑指吾儕癡方求農圃救貧病
他年未用譏樊遲

王都尉山水

元 元好問

平林漠漠數峰閒，詩在巖姿隱顯間。
自是秦樓畫眉手，不能辛苦作荆關。

王晉卿畫

元 吳鎮

晉卿繪事誠無匹，尺素能參造化功。
碧樹依微春水闊，蒼山縹緲暮雲籠。
幽深自覺塵氛遠，閒澹從教色相空。
更喜涪翁遺墨好，草堂何必獨稱工。

題王晉卿畫

元 華幼武

公子何年寫翠微江南耆老憶題詩風流文彩俱零落
水綠山青似昔時

學士院燕侍郎畫圖

宋 王安石

六幅生綃四五峯暮雲樓閣有無中去年今日長千里
遙望鍾山與此同

燕侍郎山水

宋 王安石

往時濯足瀟湘浦獨上九疑尋二女蒼梧之野煙漠漠
斷壠連岡散平楚暮年傷心波浪阻不意畫中能更覩

燕公侍書燕王府王求一筆終不與奏論讞死誤當赦
全活至今何可數仁人義士埋黃土祇有翰墨歸囊楮
題燕肅畫卷

元仇遠

溪路迢迢繞碧峰白雲迷却舊行蹤買舟歸去山中住
終日茆亭坐聽松

燕文貴山水

元袁桷

晚色蒼茫外秋聲縹緲間亂溪環水佩千嶂疊雲鬟曉
瀑村舂急風林寺鐸閒片帆如可託吾欲與君還

觀燕肅畫

雜題
四首

元唐肅

瑠臺倚中天翠壁拂遙斗疑是仙山居玲瓏見牕牖
雲殿覆巖厓風幡出林薄似聞齋磬音山禪定初覺
活活溪泉語蕭蕭谷吹繁遙憐負素子日暝未投邨
煙岑隔浦微漁屋依梁小應恐到家遲歸舟疾如鳥

題燕肅山水卷

明冷謙

依稀廬岳高僧舍髣髴商山隱者家我亦抱琴來谷口
白雲深處拾松花

題華光畫山水

宋 黃庭堅

華光寺下對雲沙
欲把輕舟小釣車
更看道人煙雨筆
亂峰深處是吾家

題華光畫

宋 黃庭堅

湖北山無地
湖南水徹天
雲沙真富貴
翰墨小神仙

題華光長老畫

二首

宋 韓駒

曉出華光寺
雲沙照眼新
歸來看圖畫
借問若為真
昨欲浮湘去
褰裳望九疑
清湘今入手
一棹更何之

書郭熙橫卷

宋
蘇轍

鳳閣鸞臺十二屏屏上郭熙題姓名崩崖斷壑人不到
枯松野葛相敬傾黃繖給舍多肉食食罷起愛飛泉清
皆言古人不復見不知北門待詔白髮垂冠纓袖中短
軸纔半幅慘淡百里山川橫巖頭古寺擁雲水沙尾漁
舟浮晚晴遙山可見不知處落霞斷鴈俱微明十年江
海興不淺滿帆風雨通宵行投篙楫杙便止宿買魚沽
酒相逢迎歸來朝中亦何有包裹觀闕圍重城日高困

睡心有適夢中時作東南征眼前欲擬寫真物拂拭東
絹付與汾陽生

郭熙山水卷

元劉因

巖姿秋意淡無弦煙影天機滅沒邊更看山翁掩書坐
只應人境兩翛然

題郭熙山水畫卷

元張庸

青山歷歷樹重重寺在雲深第幾峰比屋人家西崦下
夕陽長聽講時鐘

郭熙山水小景

明張適

何人林穴寄幽棲茅屋參差綠樹低誰遣小山招隱去
巖花落盡暝猿啼

題米元暉畫

宋朱子

楚山真叢叢木落秋雲起向曉一登臺滄江日千里

米元暉山水

元牟獻

鵲突煙樹外水遠山更長天地有如許扁舟何處藏如
何短篷底結習猶未忘是時水月繁不見此夜光於今

尚無恙懷袖行可將我亦流落者此味慣所嘗誰能畫
峨嵋坐我於其傍

有人示山水畫卷以為元暉作求詩

元戴表元

硯山山下小於菟文彩爛斑今亦無一塢亂雲濃似漆
春風吹夢過西湖

題米元暉山水

元趙孟頫

澄江漾旭日青嶂擁晴雲孤舟彼誰子應得離人羣

題米元暉山水

元吳澄

一水兩山間水如練帶山如鬟昔見江山如圖畫今觀
圖畫如江山米家下筆亦等閒盧家珍襲同瑤環一朝
身後落人手又為好者開歡顏我家一幅廣長畫朝夕
對之如列班有力莫能偷奪去常青常白色不黷若將
此幅與論價酬金何啻千百鏹

題金德原所藏元暉小景

元黃潛

牀頭書畫正縱橫忽值今朝醉眼醒起向米家船上看

雲山元是舊時青

米元暉畫卷

元 吳 鎮

煙光與山色縹緲想為容不知山色澹為復煙光濃虎
兒斷入圖畫中憑闌展卷將無同但令絕景長在眼從
渠絕靄隨春風

題米南宮畫

元 郊 韶

風流不見米南宮依舊雲林遠樹重貌得匡廬舊遊處
半江秋色洗芙蓉

題朱元暉江山小景

元趙汭

滄波浩無津，揮手揚帆去。
迴顧江上山，蒼蒼但煙樹。
結茅傍洲渚，豈少垂綸處。
終然塵迹近，未及扁舟趣。
世運如風飈，朝新夕成故。
白雲何亭亭，倏爾天際住。
寄謝山中人，奚為獨多慮。

元暉山

元郭昇

灌木蔭滄洲，閒雲疊層巘。
茅茨在咫尺，徑路渾莫辨。
玉家玉印章，翰墨屹冠冕。
悵望海嶽菴，禾黍西風轉。

題朱元暉墨山

元于立

生來墮塵網苦為塵網縛暇日起我早騎驢出東郭城
門老人髮半垂問我騎驢何所之為言欲向山中去茅
屋正在清溪濬山中之人面如玉手把素書跨黃犢石
泉夜煮茯苓香滿屋秋雲邀共宿綠蘿曉月懸松風縹
緲惟聞煙外鐘十年往事一回首已隔雲山千萬重潦
倒狂吟頭半白把卷令之念疇昔石田瑤草近如何題
詩好寄山中客

題米元暉畫山水

元陸友

翳翳雲中樹亭亭江上山秋風生柁尾蕩漾碧波間

題元暉山水

元張天英

江上江雲漠漠寒有時帶雨過層巒只愁海嶽菴前路
水沒黃沙鴨嘴灘

畫山水歌題米元暉卷

元張天英

我有山水癖由來好幽棲十年遊鴈蕩五年遊會稽或
言秦王昔時愛仙術驅石下海如鳬鷖洞口誰來斲龍

耳驪珠夜照天雞啼三峰參差九華老蛟龍鼓浪方壺
低醉墨淋漓落吾手咫尺萬里雲淒淒初疑巨靈闢開
翠巖濕馮夷擊碎青玻璃又疑劉阮雙行赤城下漁舟
棹入桃源溪對此長歌發幽思便欲著屐來攀躋我家
碧山最奇絕綠蘿萬丈緣丹梯憶昨金門拂衣去自種青
松與人齊幾人欲畫畫不到惟有四時雲月可以相招
攜吾負碧山此為客何異乎巢由軒冕行塵泥從吾好
歸來兮

題宋子章效米元暉山水圖

明劉基

昔時米南宮父子同畫癖油然煙雨態千里入盈尺近
代宋尚書筆意妙欲逼置之几格間新舊莫辨識應是
前後身神會造化迹鴻濛迷日月瀕洞飛霹靂蒼崕晦
中斷天闕杳高隔洪濤漲無倪龍虎移窟宅農夫怨昏
墊樵牧絕行跡破屋兩三家搖撼已傾側得非杜少陵
無乃陶彭澤簷茅委泥濘籬菊沒狼籍空江乏舟楫汗
漫安所適披圖瞻青冥惆悵至終夕

題米元暉山水

明張以寧

高堂曉起山水入古色慘淡神靈集望中冥冥雲氣深
祇恐春衣坐來濕江風吹雨百花飛早晚持竿吾得歸
身在江南圖畫裏令人却憶米元暉

題米老山水

明王偁

海嶽菴前覓舊蹤蒼茫雲樹米南宮別來幾片青山影
都付寒鷗一逐風

題米南宮水墨圖

明吳寬

雲山煙樹總模糊
此是南宮鵲突圖
自笑頂門無慧眼
臨牕墨蹟澹如無

題畫米山

明
李日華

吳山盡處越山涯
水木清華處處佳
山鳥忽來啼不歇
聲聲似勸我移家

米家山水 二首

明
李日華

石赭斑斑半雜苔
晴雲纔去雨雲來
米家山已渾無定
潑墨何人解脫胎

平磯小坐一開顏
樹影蕭疎石蘚斑
莫訝濕雲飛不起
米家原自有晴山

小米山水

明 祝允明

襄陽松瀋未曾乾
十里瀟湘五尺寬
樵徑不禁苔露滑
漁簑長帶水雲寒
澄澄僧眼連天碧
澹澹娥眉隔霧看
恐為醉翁當日寫
平山堂上雨中觀

做米元章筆意因題

二首

明 董其昌

烏絲白練是生涯
但向滄江問米家
從說遠山多娥媚

可知矮樹是枇杷

春入寒枝未著花
濕雲細雨罨平沙
天公似合襄陽戲
我畫煙山不較差

米友仁畫卷

元 吳 鎮

元章筆端有奇趣
時灑煙雲落縑素
峰巒百疊倚晴空
人家掩映知何處
歸帆直入青冥濛
曲港荷香有路通
更愛涪翁清絕句
相攜飛上蓬萊宮

范寬山水

元 張 翥

憶昔往尋剡中山四明天姥相縈盤客路上頭穿鳥道
行人脚底蹋風湍旦寒露重多成雨洩霧濛雲互吞吐
僕夫相呼巖壑間空響應人作人語溪窮岸斷地忽平
石門壁立如削成隔水無數山花明中有人家雞犬聲
向來老眼曾到處此境俱作桃源行百年留在范寬筆
水墨精神且蕭瑟上有翰林學士之院章恐是宣和舊
時物林獼野鶴應自在令我相見猶前日時平會乞閒
身歸一壑得專吾事畢

題魯彥康所藏范寬山水手卷

元 錢惟善

看雲終日坐蒼苔溪上千峰紫翠堆
種竹人家臨水住抱琴客子過橋來
欲書盤谷先生序更把潯陽處士杯
他日卜居能似畫草堂題作小蓬萊

范寬畫卷山水

元 牟魯

丘壑胸中起龍蛇筆底生斯人皆沒世
羨爾獨鍾情未識真為幻徒聞畫有聲
誰能寫廬阜翠色到牕楹

范寬畫卷山水

元 劉元佐

范寬筆法天下稀峰巒峭拔尤崛奇龍翔鳳舞入霄漢
白晝慘淡陰雲垂玉堂仙人揮翰手綵筆留題世希有
祇今流落百餘年滿紙龍蛇欲飛走

范寬畫卷山水

元王蒙

范寬墨法似營丘散落人間二百秋咫尺畫圖千里思
山青水碧不勝愁

范寬畫卷山水

元葉廣居

范翁作畫絕代無巖壑交錯青珊瑚玉堂仙人妙題品

千載見題如見圖
亂後圖書絕狼籍
奇珍委地無人識
蕭條錦繡世間希
拂拭墨痕三歎息

奉題朱澤民先生畫山水圖

元李祁

洞庭之南湘水東
青山奕奕蟠蒼龍
雲陽峰高七十二
欲與衡嶽爭為雄
我家近在雲陽下
來往看山如看畫
十年塵土走西風
每憶雲陽動悲咤
吳中勝士朱隱君
筆精墨妙天下聞
畫圖畫出湘江水
青山上有雲陽雲
雲陽山高湘水綠
十年不見勞心目
只今看畫如看山

萬里歸情寄鴻鵠

題朱澤民畫山水

元黃鎮成

與客浮湘水琴書共一舟
雲間雙樹曉天外數峰秋
指顧消塵慮棲遲發擢謳
未知身是畫明月滿滄洲

朱澤民山水

元鄭元祐

樓觀參差山磴坳
漁舟遠嘯出林梢
白雲度盡千峰碧
鬻石幽人始定交

朱澤民山水

元鄭元祐

吹簫江浦秋舟蕩碧雲幽擬遡巖松下詩盟訂白鷗

題朱澤民山水

元陳基

東曹興逐秋風起長揖齊王歸故里託言鱸膾與蓴羹
遠害全身良有以神交海上陶朱公遭世雖殊心則同
讀書把釣松江尾仰看浮雲行太空八月嚴霜下喬木
萬里青冥眇飛鵠為謝長安馬上郎世間何物為榮辱

題朱澤民山水

元郊韶

洞庭南下水如天蓬底看書白日眠我亦憐君愛山色

直須買酒過秋船

朱澤民畫

明 蘇伯衡

朝朝謀隱地忽見好山川雄麗皆衡霍幽深別澗瀦羊
眠松下石虹掛屋頭泉便欲抽簪去依崖結數椽

朱澤民山水歌

明 虞堪

江山青青江水綠市上何人吹紫竹避暑宮前不見春
落花滿地遊麋鹿千古江山列畫圖朱侯解寫咫尺煙
模糊扁舟依然在洲渚應可自此歸五湖昔人去者今

有無昔人去者今有無

觀朱澤民所畫山水有感

明袁凱

朱公畫圖愛者衆聲價端如古人重王卿鉅公數見尋
往往閉門稱腕痛我時挾冊遊郡城朱公愛我詩律精
時時沽酒留我宿共聽西牕風雨聲清晨起來忘洗盥
短衣飄蕭臨几案太行中條眼底生巖岫冥冥氣凌亂
禹鑿龍門疏洛水根入黃河源不斷南及衡陽抵桂林
東入會稽連海岸是中寘我一畝宮正如浮萍在江漢

溪流浣浣石齒齒夾岸桃花途遠邇原頭煙霧散雞犬
屋裏詩書雜童穉扁舟遠來知是誰豈是昔日鴟夷皮
五湖鰕菜殊可樂千古功名何足奇只今四十有三載
公竟不歸畫圖在世間好手豈易得終日紛紛勞五彩
感時念舊心獨苦況我頭顱白如許呼兒捲却不忍看
白髮高堂淚如雨

朱澤民山水

明沈周

睢陽老人營丘徒意匠妙絕絕代無為留清氣在天地

便就片紙開江湖長松落葉風細細幽構縈蘿倚江住
壁虎書魚蕩水光老屋疎茅通雨氣老人不歸空北山
芳杜春風應厚顏微官縛人萬事拙安得浮雲相往還
宦海黃塵迷白髮雲壑風泉清入骨思家看畫方兀然
叫落西牕子規月

題湯溪湖氏藏朱澤民山水大幅


明

吳寬

晴雲亂落長澗疊嶂秀依密林水樂鏗然自作茅堂可
徹鳴琴



御定歷代題畫詩類卷十一



總校官庶吉士臣侍

朝

校對官編修臣裴

謙

謄錄監生臣范

栩

欽定四庫全書薈要

集部

御定歷代題畫詩類卷十二

欽定四庫全書會要

御定歷代題畫詩類卷十二目錄

山水類

純甫出釋惠宗畫 宋王安石

惠宗畫 宋王安石

題巨然畫 元王冕

僧巨然畫 元鮮于樞

巨然山水 元袁桷



巨然小景

明高啟

秋日寫巨然筆意與若休

明李日華

題董北苑山水

元鮮于樞

題董源山水圖

元吳澄

董源小幅

元吳鎮

趙伯駒畫

元吳鎮

趙伯駒畫

元吳鎮

趙千里山水長幅

元鄧文原

趙千里山水長幅 元吳鎮

趙千里畫 元吳鎮

記子昂畫 元虞集

趙子昂仿顧愷之 元鄧文原

趙待制山水 元陶宗儀

子昂畫 元陳高

子昂仿顧愷之 元吳鎮

趙子昂倣陸探微筆意 元黃公望

趙文敏公山水 元王逢

子昂小景 明祝允明五首

題松雪山水 明僧古淵

題趙仲穆畫 元郊韶

題趙仲穆山水 元仇遠二首

題仲穆山水 元貢師泰

題趙仲穆山水圖歌 元黃玠

題趙仲穆畫 明王燦

子久為危太樸畫

元吳鎮

子久為徐元度卷

元吳鎮

黃子久山水

元鄭元祐二首

追和鐵崖先生題黃子久畫

明周傳

倣子久小筆

明李日華

題倣黃子久畫

明董其昌

題黃子久山水

明僧妙聲

王叔明卷

元吳鎮

王叔明山水圖

明吳寬

長幅繭紙倣叔明

明李日華

山水倣叔明與竹雨

明李日華

題王叔明畫

明董其昌

題商德符山水圖

元馬祖常

商學士畫山水歌

元馬祖常

題商侯畫山水圖

元貢奎

題胡廷暉畫

元鄭韶

再題廷暉山水 明張羽

題高房山畫 元鮮于樞

高房山畫 元王士熙

次韻題高房山畫卷 元倪瓚

題高房山畫 明徐賁

題高房山畫山水行 明黃希英

高房山小畫 明傅汝舟

題高房山山水 明吳寬

題高房山橫軸

明文徵明

題畫山水似盛子昭

元黃玠四首

題韓介石所藏盛子昭畫

元黃玠

題盛子昭畫

明貝瓊

題盛懋畫

明郭鈺

題盛叔章畫

元鄭洪

盛叔章山水畫

元王璋

盛叔章山水畫

元楊維禎

盛叔章畫

明鮑恂

題倪雲林畫

元錢惟善

題元鎮畫

元鄭韶三首

倪雲林為靜遠畫

元黃公望

和雲林題畫

元鄭元祐

雲林小景

元鄭元祐

題雲林小景圖

元倪瓚

次韻雲林畫

元華幼武

為吳子道題雲林畫 元華幼武

雲林畫山水竹石 元華幼武

題倪雲林畫 明李東陽

倪雲林畫 明卞同

題雲林小景 明高啓

題倪雲林畫 明俞貞木

雲林畫 明王燦

題倪元鎮小畫 明施漸

題做雲林筆意

明李日華

題做倪迂畫

明董其昌

題倪雲林小幅山水

明僧元璞

題曹雲西畫

元倪瓚

題曹雲西山水

元王冕

題雲西畫卷

元吳鎮

曹雲西山水

明王遠

題唐子華山水

元鄭韶

題唐子華畫山水

明僧復初

欽定四庫全書薈要卷一萬九千一百二十集部

御定歷代題畫詩類卷十二

山水類

純甫出釋惠崇畫

要予作詩

宋

王安石

畫史紛紛何足數
惠崇晚出吾最許
旱雲六月漲林莽
移我翛然墮洲渚
黃蘆低摧雪翳土
鳬雁靜立將儔侶
往時所歷今在眼
沙平水澹西江浦
暮氣沈舟暗魚罟
欹眠嘔軋如聞櫓
頗疑道人三昧力
異域山川能斷取

方諸承水調幻藥灑落生綃變寒暑金坡巨然山數堵
粉墨空多真漫與大梁崔白亦善畫曾見桃花靜初吐
酒酣弄筆起春風便恐漂零作紅雨流鶯探枝婉欲語
蜜蜂掇蕊隨翅股一時二子皆絕藝裘馬穿羸久羈旅
華堂豈惜萬黃金苦道今人不如古

惠崇畫

宋 王安石

斷取滄州趣移來六月天道人三昧力變化只和鉛

題巨然畫

元 王冕

溪山對雨起呼酒一笑還披萬里圖
疎樹遠山秋淡薄
飄風流水盡模糊

僧巨然畫

元鮮于樞

秋鱸春鰕足杯羹萬頃煙波兩櫂橫
就使直鉤隨分曲
不將浮世釣浮名

巨然山水

元袁桷

空江浩蕩挾秋聲不是匡廬只秣陵
老子定回神觀靜
笑渠艇子浪千層

巨然小景

明高啓

隔溪山閣映秋開，坐久鐘聲度水來。
遙指石橋邨樹杪，一僧歸處是中台。

秋日寫巨然筆意與若休

明李日華

山光沉綠樹，酣黃九月江南。
欲試霜獨坐灘頭，不垂釣蓼花風急，送漁榔。

題董北苑山水

元鮮于樞

愛山不得山中住，長日空吟憶山句。
偶然見此虛堂間，

頓覺還我滄洲趣陰厓絕壑雷雨黑蒼藤老木蛟龍怒
岸石犖确溪澗闊知有人家入無路一重一掩深復深
危橋古屋依雲林是中宜有避世者我欲徑去投冠簪
源也世本膏粱子胸中丘壑有如此後來僅見僧巨然
筆墨雖工意難似想當解衣盤礴初意匠妙與造化俱
官閑祿飽日無事吮墨含毫時自娛誰憐齷齪百僚底
雙鬢塵埃對此圖

題董源山水圖

元
吳澄

帝里春風二月天黃塵千丈暗鞍韉蒼蒼萬木煙雲裏
何處山川到眼前

董源小幅

元吳鎮

煙水冥迷山遠近高山臨水更清寒茆堂深倚林中構
商舶遙從海島還雲起亂峰生巧思鳥飛殘照入遐觀
生綃僅尺無窮意誰識經營慘淡間

趙伯驕畫

元吳鎮

風色淒其上碧山一朝林木變紅顏幽人為惜深秋色

忘却驅馳古道間

趙伯駒畫

元吳鎮

璚館芙蓉罨畫山
天香縹緲碧雲間
鶴巢松頂藤花落
一任山人指顧間

趙千里山水長幅

元鄧文原

蒼山高處白雲浮
樓閣參差帶遠洲
千尺虯龍依絕壁
一羣鸛鶴唳清秋
山翁有約憑雙屐
楚客無心滯碧舟
最是霜林好風景
居然咫尺見丹丘

趙千里山水長幅

元吳鎮

宋室有千里疑自蓬萊宮繪事發天性深研境益工山
高藏石磴洞古青蒙叢秋風遍林壑萬樹葉欲空唯有
松與石不改歲寒窮行行何處客豈是商山翁臨江有
虛閣一望波溶溶輕舟徐蕩漾西嶺夕照紅荆關為揖
讓二李堪與同庸物奚足數新圖不易逢當年置長府
珍祕更為崇書竟發長嘯兩腋來清風

趙千里畫

元吳鎮

猗歟千里諸王孫畫圖猶見二李存盤迴虛閣凌空起
蒼鬱長林來雨繁仙姬仙客居絕境試展殊覺晴雲翻
持向故山茅屋底咫尺却擬蓬萊根

記子昂畫

元虞集

春風動蘭葉庭戶光陸離言收竹上露石角挂練衣車
行不擇路莽苾何楚楚遊子憺忘歸徘徊歲云莫

趙子昂仿顧愷之

元鄧文原

溪邊春樹綠成羣重疊青山翠影分客子何來忘歸去

歌聲遙落水中聞

趙待制山水

元陶宗儀

山外溪平不肯流
山前喬木易知秋
水晶宮裏清幽地
不信無人著釣舟

子昂畫

元陳高

風動秋山日已晡
舊時林苑盡荒蕪
王孫去國猶無恙
解寫江南煙樹圖

子昂仿顧愷之

元吳鎮

隔水山高青隱日傍溪古樹綠藏雲閑翁自有閑游伴
更愛溪鷗閑作羣

趙子昂倣陸探微筆意

元黃公望

千山雨過瓊琚濕萬木風生翠幄稠行遍曲闌人影亂
半江浮綠點輕鷗

趙文敏公山水

公於畫左題云至大三年六月望日為吳彥良畫并詩有岸靜樹陰

合溪晴雲氣流之句
想在鷗波亭作也

元王逢

何山弁山秀可掬上若下若蒼苔綠翰林學士偶歸來

亭倚鷗波送飛鵠鵠飛盡沒蒼茫境衣上青天倒搖影
鹿頭舫子湖州歌想帶南風覺淒冷冰盤瓜李進仲姬
生綃畫就復題詩鄭虔三絕世無有嗚呼何幸再見至
大三年時

子昂小景

五首

明
祝允明

春山雨新沐掩靄結濃綠一葉金芙蓉粲粲迎朝旭
漁舟何所至兩兩鏡光中
泔汨春漲更喜天無風
江亭小於艇松子落滿頂盡日無人來流水抱虛影

晴陽破嵐暝水色當春和如何異人境而有樵者歌
隔塢有絕壁蘿扉對山開客子何為者能入深山來

題松雪山水

明僧古淵

雪後潮痕上釣磯江南天水一絲微萋萋芳草迷禾黍
何事王孫尚不歸

題趙仲穆畫

元郊韶

水晶宮裏佳公子挂笏看山逸興多昨夜溪南新水漲
釣絲晴拂白鷗波

題趙仲穆山水二首

元仇遠

綠林紅樹石崢嶸有客攜琴訪友生
今夜西軒風月好殷勤為我鼓商聲

王孫遺迹在桐鄉留得當年翰墨香
回首西風多感慨不辭援筆賦嵇康

題仲穆山水

元貢師泰

翡翠為崖金作波白雲重疊護層阿
背琴童子松間坐束帶仙人馬上過
高閣半天開寶月飛流千尺寫銀河

王孫已老丹青在轉覺風流意氣多

題趙仲穆山水圖歌

元黃玠

遠山如湧波近山如積石遠近千萬山崢嶸起寒碧赤
甲白鹽江影空青天芙蓉五老峰野橋邨路獨歸客耳
邊髣髴東林鐘滄浪老人唱歌處日暮停篙倚江樹倒
挑笠子漁竿頭隔水高樓訪誰去

題趙仲穆畫

明王燦

十二璚樓紫翠重萬年琪樹落秋風南朝無限傷心事

都在殘山剩水中

子久為危太樸畫

元吳鎮

子久丹青好新圖更擅場浮空煙水闊倚岸樹陰涼咫尺分濃澹高深見渺茫知君珍重意愈久豈能忘

子久為徐元度卷

元吳鎮

木落空山秋氣高一聲疎磬出林皋歸帆點點知何處滿目蒼煙尚未消

黃子久山水

二首

元鄭元祐

小黠大癡誰復然畫山畫水亦隨緣懸厓絕谷噴流泉
此中即是安養地九品蓮華光燭天

衆人皆黠我獨癡頭蓬面皺絲鬢垂勇投南山刺白額
飢緣東嶺采青芝仲雍山趾歸休日尚餘平生五色筆
畫山畫水畫樓臺萬態春雲硯坳出只今年已八十餘
無復再投光範書留得讀書眼如月萬古清光滿太虛

追和鐵崖先生題黃子久畫

明周傳

最愛山居養性靈空山為几翠為屏亂峰雨過雲猶合

小洞春深草更青對月漫題招鶴詠臨池長寫換鵝經
興來還解吹簫管有約離人夜半聽

倣子久小筆

明李日華

不是春山淡欲無江空沙落眼模糊鵲鳩強要司晴雨
不管人眠著意呼

題倣黃子久畫

明董其昌

積鐵千尋屈紫虛雲端雞犬見邨墟秋光何處堪消日
流澗聲中把道書

題黃子久山水

明僧妙聲

黃公東海客能畫逼荆關意盡崎嶇外精深溟滓間
猿啼明月峽木落浩疊山谷口蘿煙暝騎驢獨未還

王叔明卷

元吳鎮

短縑幾許容丘壑鬱鬱喬林更著山應識王郎胸次好
未教消得此身閒

王叔明山水圖

明吳寬

黃鶴高樓已槌碎空有江南黃鶴山山深有客持樵斧

終日置身林木間
臨風高歌白石爛
隔水或看秋雲還
老夫亦有幽居興
對此徑欲遺柴關

長幅繭紙倣叔明

明李日華

遠山煙重樹萋萋
潮落沙寒水一溪
獨坐茅亭無一事
晴鳩啼過雨鳩啼

山水倣叔明與竹雨

丙寅三月
清明日

明李日華

栗留呼醒仙遊夢
洞壑虛無嵐翠空
意裏尚存三疊水
眼前猶見百盤松
有田有屋雲堆處
半郭半邨山影中

筆墨自娛聊爾爾不貪人喚作盧鴻

題王叔明畫

明董其昌

南山與秋色氣勢兩爭時閑者解其紛君今已閒未

題商德符山水圖

元馬祖常

曹南山君畫山水幅絹咫尺千萬里古木樛枝障霧雨
蒼石斷裂蹲虎兕路幽應有仙人室樓閣恍惚雲氣入
翰墨黯黯絕丹碧芙蓉峰高觀海日

商學士畫山水歌

元馬祖常

商侯畫山并畫水當今天下無雙比昔者累蒙天子知
畫日三接賜筐篚墨滓翻流雪壁滑閩嶠蜀門生寸晷
五年送絹或不得岸幘飲酒辱畫史江波沉沉樹含霧
疊嶂千層問歸路玄雲夜合風雨交漁師不畏蛟龍怒
倚雲茨屋如穹龜鵲枝應有猿獠悲暝靄依稀蜃樓出
暗霏髣髴黿峰移君不見剡藤一丈光陸離嗚嗚野父
秋行迷

題商侯畫山水圖

元貢奎

秦鞏諸山天下美相君愛山心獨喜商侯落筆圖畫裏
盤桓咫尺藏千里遠山天際抹修眉近山淡黛連雲起
下有百尺清溪水石闌木盾懸崖底時見行人去如螳
危橋吹斷橫沙尾邨落林園接遐邇雲中世家重釋流
東剡凌虛構華侈搥鐘擊鼓兩巖間西剡輝煌賀蘭氏
商周遺俗亦在耳豈無當時隱君子我欲追遊繭雙趾
却愛孤舟岸旁艤商侯商侯巧能擬安得從之慰我思
呼酒盡埽溪藤紙

題胡廷暉畫

元 郊 韶

仙館空青裏春船罨畫中鷗波千丈雪漁笛一絲風

再題廷暉山水

明 張 羽

近代丹青誰第一精絕獨數吳興胡魏公家傳摘瓜圖
將軍妙筆絕代無年深粉墨紛糝糊公命胡也全其污
鷗波亭前山滿湖賓客不來人跡疎以手畫肚私傳摹
歸來三日神始甦下筆直與前人俱今人不見古人畫
古畫自與今人殊嗚呼眼前不復見此物吾與購之干

明珠

題高房山畫

元鮮于樞

素有煙霞疾開圖見亂山何當謝塵迹縛屋住雲間

高房山畫

元王士熙

吳山重疊粉團高有客晨興灑墨毫百兩真珠難買得
越峰壓倒湧金濤

次韻題高房山畫卷

元倪瓚

屋邊昨夜春風起蔣芽荇葉生春水睡醒獨坐無人聲

歷歷青山水光裏

題高房山畫

明徐賁

風流一代房山老胸中丘壑蘊天巧有時意匠稍經營
萬疊雲山筆端埽嗚呼斯人往矣不可攀畫圖千載遺
人間

題高房山畫山水行

明黃希英

房山西湖之子孫一腔汎埽與雲屯有時槎枒撐肺腑
幻出雲濤激濫翻黿頭羣峰壓不住海上浮來雲外露

長松落落鎖翠煙前邨後邨盡寒雨小橋駕壑無人行
兩溪流水經石磈亂樹深中更縣邈五城縹緲飛朱甍
此君北斗司喉舌妙手場中誇藝絕規模董李神更豪
素練雲煙欲明滅中堂忽生太古色滉漾交迴渺難測
安得人間有此幽曠可冥搜吾將誅茅結屋終老長松
側

高房山小畫

明
傅汝舟

春山溟濛氣欲滴古絹元代標房山空亭盡與惡木離

恍有仙客遊其間吾鄉漫仕早學此筆意迴入房山裏
晴天簡點更摩挲滿堂煙霧來無何

題高房山山水

明 吳寬

燕南感翠維房山高公昔者生其間戲拈畫筆少明豁
玉女峰亞垂煙鬟積雨初收隔春樹望見人家鵲邊住
亦知中有王維詩行到水窮無覓處

題高房山橫軸

明 文徵明

春雲離離浮紙膚翠攢百疊山模糊山空雲斷得流水

咫尺萬里開江湖依然灌莽帶茅屋亦復斷渚迷菰蒲
岡巒出沒互隱見明晦陰晴日千變平生未省識匡廬
玉削芙蓉正當面宛轉香鑪霏紫煙依稀夢澤分秋練
未遂扁舟夢裏遊酒醒獨展燈前卷問誰能事奪天工
前元畫史推高公已應氣槩吞北苑未合胸次饒南宮
南宮已矣北苑死百年惟有房山耳祇今遺墨已無多
窻前把卷重摩挲世間吮筆爭公麼埽滅畦徑奈爾高
公何

題畫山水似盛子昭

四首

元黃玠

冉冉山上雲纍纍水中石梢梢林莽高黯黯崖谷黑東
岡特秀絕拔地起千尺突兀衆峰間猶是太古色

連山根插江江碧石齒齒層巔高出雲老樹下壓水巖
扉俯深迴磴道陟紆委欲持一壺酒慰彼幽棲子

前山如立梢後山如倚較遠近千萬山斗絕入牛角礬
頭積磊砢石面鬬礪确是中無征徭民俗猶愿慤

回峰危欲墮峭徑深可入縈紆度壁隴窈窕去井邑泉

懸淨練明崖擁積鐵澀緬懷貞白君相從負雲笈

題韓介石所藏盛子昭畫

元黃玠

隆隆大谷深挺挺嘉木秀崇岡折陰壑懸水落長雷槎
牙松顛迴側塞石角鬬來者豈阮生尚爾冠服舊清嘯
滿空山高人在危構胡不從之居分瓢飲雲竇

題盛子昭畫

明貝瓊

石轉交流水山浮欲動雲名園鄭谷迴絕境輞川分老
樹龍初化仙人鶴不羣已臨吳道子不數李將軍

題盛懋畫

明郭鈺

遠島映微紅疎林帶寒綠石上一些關溪邊兩茆屋輕
風花落地細雨雲歸谷側耳試閑聽疑聞紫芝曲

題盛叔章畫

元鄭洪

記得天台鴈宕歸滿山松露濕人衣十年眼底無林壑
今日畫圖看翠微

盛叔章山水畫

元王璋

草堂只在南湖上山色水光相與清鷗鳥不來魚不起

落花風颺讀書聲

盛叔章山水畫

元楊維禎

春波門前水如酒十里竹西歌吹迴蓮葉甯深香霧卷
桃花扇小綵雲開九朵芙蓉當面立一雙鸕鶿近人來
老夫於此興不淺玉簫時吹鷓鴣濫堆

盛叔章畫

明鮑恂

煙濕空林翠靄飄渚花汀草共蕭蕭仙家應在雲深處
祇許人間到石橋

題倪雲林畫

有序

元錢惟善

曲江老人喜雲林之畫與詩不徒作蓋識其人之賢
故次其韻以發清賞

太丘遺澤被諸孫東蔡深居雨外邨濁水摩尼因見地
好山罨畫正當門得錢贖買書千卷留客時沽酒一尊
名利區區等春夢貪夫未覺古槐根

題元鎮畫

二首

元郊韶

斷靄生春樹微茫隔遠汀梁谿新月上照見惠山青

高江新水生微月流雲度美人胡不知相思隔春樹

倪元鎮畫

元 郊 韶

玄館夏初度青林暑氣中開軒對流水坐石待薰風花
落葛巾側鳥鳴山几空經鉏者誰子散髮奏絲桐

倪雲林為靜遠畫

元 黃公望

遙山近山青欲滴大木小木葉已疎斜日疎篁無鳥雀
一灣溪水數函書

和雲林題畫

元 鄭元祐

昔從九龍隱來住百花莊江上春樹碧山中秋草黃放
情揮翰墨習靜愛林塘莫道成樗散終期作棟梁

雲林小景

元鄭元祐

雲起野橋西層峰翠隔溪欲尋清閼閣古木樸簷低

題雲林小景圖

元倪瓚

赤城霞暝神芝秀洞裏桃花不記春何事却將山水脚
鍾陵市上踏紅塵

次韻雲林畫

元華幼武

山光澹澹樹陰陰
溪水湯湯漱玉琴
此境不知何處有
清風吹起鹿門心

為吳子道題雲林畫

元華幼武

萬里乾坤一草亭
吳山相對越山青
祇憐脩竹最深處
佳客長留醉不醒

雲林畫山水竹石

元華幼武

秋雲無影樹無聲
湛湛長江鏡面平
遠岫煙銷明月上
小亭危坐看潮生

題倪雲林畫

次倪韻

明李東陽

江雲亂人目，江水綠人衣。
苔雨疑將濕，林風聽漸稀。
吳儂歌竹送，越客采菱歸。
不見滄洲老，垂楊拂舊磯。

倪雲林畫

明卞同

雲開見山高，木落知風勁。
亭下不逢人，斜陽澹秋影。

題雲林小景

明高啓

歸人渡水少，空林掩煙舍。
獨立望秋山，鐘鳴夕陽下。

題倪雲林畫

明俞貞木

棲神山下玄元館華表巍然鶴未歸寂寂小亭人不見
夕陽雲影共依依

雲林畫

明王燦

羣樹葉初下千山雲半收空亭門不掩禁得幾多秋

題倪元鎮小畫

明施漸

片石叢篁豈在多丹青只論意如何若能咫尺看千里
即是瀟湘壁上過

題倣雲林筆意

明李日華

木葉蕭疎煙靄濃層層青嶂削芙蓉詩人好句從何得
只在波光樹影中

題倣迂畫

明董其昌

迂翁高臥九龍雲清閼風流海外聞雪後江山青似染
拈來却勝李將軍

題倪雲林小幅山水

明僧元璞

雲林隱者絕風流常到澗西山寺游下馬脫巾青竹裏
題詩寫畫野泉頭房山墨法誰能得謝朓襟懷自可侔

便擬梁溪一相覓桃花春水隔芳洲

題曹雲西畫

元倪瓚

吳松江水碧於藍怪石喬柯在渚南鼓柁長吟採蘋去
新晴風日更清酣

題曹雲西山水

元王冕

旭日耀蒼巘翠嵐生嫩寒幽人詩夢醒清響得松湍
題雲西畫卷

元吳鎮

雲西老人清且奇隨意點筆自合詩高尚不趨車轍迹

新圖不讓虎頭癡溪中有人空佇立江上征帆歸去遲
何處溪歌聲欸乃碧雲疎樹晚離離

曹雲西山水

明王遠

世治多福人時危多貴人貴人乃鬼撲福人真天民緬
憶曹雲西生死太平辰高秋下孤鶴想見英風神苑苑
露擗間幽幽水石濱槩打甫里船角墊林宗巾往訪趙
松雪滿載九峰春斯圖作何年援筆為嘒呻池廢餘野
鵝井渌搖青蘋

題唐子華山水

末句用楊
廉夫五字

元 郊 韶

我愛會稽楊使君
洞庭秋月約平分
時時吹笛中流去
臥看苔山如畫雲

題唐子華畫山水

明 僧復初

江雲如雪樹高低
竹裏人家傍水西
滿地松陰春雨過
好山青似若邪溪

御定歷代題畫詩類卷十二

欽定四庫全書薈要

御定歷代題畫詩類卷十三目錄

山水類

題江貫道山水

宋劉克莊十首

題俞秀才所藏江參山水橫軸

宋陳與義二首

題祝生畫

宋朱子

題祝孝友畫卷

宋朱子二首

題大年小景

宋黃庭堅

趙大年小景

元程鉅夫

李營邱真蹟

元吳鎮

李思訓妙筆

元鄧文原

題馮文仲畫山水

元鄭東

為馮文仲畫山水小幅

元倪瓚

題馮文仲山水

元鄭元祐二首

文仲小幅山水

明沈周

馮文仲畫

明陳繼儒

袁君庭玉以所藏何思敬山水圖求題為賦長句

元戴良

題何監丞畫山水歌

元戴良

題柯敬仲畫

元虞集五首

題柯丹邱畫

元郊韶

為高安何思恭題方壺所畫山水

元劉永之

方方壺畫

元吳鎮二首

題方壺畫

明鎬炳

題方壺畫

明王燦

題上清方壺山水

明陳煒

方方壺畫

明文徵明

題方方壺畫

明僧大圭

題趙彥徵畫

元錢惟善

題趙彥徵畫

明張簡

趙彥徵畫

明宋杞

題趙彥徵溪山小景圖

明僧來復

趙彥榮臨畫

元郊韶

彥敬小景

明張寧

題彥顥畫中小景

明聶大年二首

為祝彥中題山水圖

明劉基

為彥中題畫

明龔詡

題丁生所藏錢舜舉山水

元龔璠

題錢舜舉山水小景

明薛瑄

題吳季良所藏戴文進山水

明程敏政

題戴文進山水圖 明陳璽

戴文進小幅 明祝允明

次陸太宰全卿題戴文進畫卷 明王世貞

吳偉江山圖歌 明何景明

吳偉畫 明嚴嵩

題文徵明畫 明陸深

題文徵仲小景 明鄭鵬

題石田畫 明邊貢二首

題石田翁贈朱守拙小景

明陳蒙

題倣石田大幅

明李日華

為楊起同題沈石田擬謝雪邨山水

明吳寬

為陳玉汝題啓南山水大幅

明吳寬

為史明古題沈啓南畫

明吳寬

題唐子畏山水圖

明顧璘

唐寅畫山水歌

明祝允明

題羅汝文畫山水

明林誌

題元人畫

明鄭鵬

欽定四庫全書薈要卷一萬九千一百二十一集部

御定歷代題畫詩類卷十三

山水類

題江貫道山水

十首

宋 劉克莊

世間平遠景萬幅在江家晚至番君國方知不是夸
一棹微茫裏孤亭紫翠間恍疑涉彭蠡又似訪廬山
江險不容極禹功胡可忘向來小龍子衮冕食干羊
夾立朝羣玉濃妝列萬筭中州不敢頓拋在瘴雲西

節山千萬疊不得見天全帆出扶胥口無山只有天
雪冒禹碑石雲埋泌草堂早知抱遺恨悔不挾乾糧
半夜黃天蕩樓船雪浪中當年草檄客今日負樵翁
太武求洩處支祁著鑠邊淮風晨裂面淮浪夜驚船
展卷嗟某也東西南北人昔還行脚債今作臥遊身
一疋好東絹天寒家未溫儘教兒拆繡焉管婦無禪
題俞秀才所藏江參山水橫軸 二首

宋
陳與義

卷中衮衮溪山出筆下明明開闢初不肯一揮為婦計
俞郎作意未全疎

萬壑分煙高復低人家隨處有柴扉此中只欠陳居士
千仞岡頭一振衣

題祝生畫

宋朱子

裴侯愛畫老成癖歲晚倦游家四壁隨身只有萬疊山
秘不示人私自惜俗人教看亦不識我獨摩挲三太息
問君何處得此奇和璧隋珠未為敵答云衢州老祝翁

胸次自有陰陽工峙山融川取世界咳雲唾雨呼雷風
昨來邂逅衢城東定交斗酒歡無窮自然妙處容我識
為我埽此須臾中爾時聞名今識面回首十年齊掣電
裴侯已死我亦衰祝君雖老身猶健眼明骨輕鬚不變
筆下江山轉蔥蒨為君多織機中練更約無事重相見

觀祝孝友畫卷

二首

宋朱子

天邊雲遶山江上煙迷樹不向曉來看詎知重疊數
草閣臨無地江空秋月寒亦知奇絕景未必要人看

題大年小景

宋 黃庭堅

水色煙光上下寒
忘機鷗鳥恣飛還
年來頻作江湖夢
對此身疑在故山

趙大年小景

元 程鉅夫

匹馬衝寒踏落花
杏園深處曲江涯
何如相對風軒坐
喚得漁船傍酒家

李營邱真蹟

元 吳 鎮

萬仞蒼山百尺樓
西風吹送滿林秋
疎鐘遙落空亭裏

畫屬營邱筆底收

李思訓妙筆并序

元 鄧文原

思訓作畫雖由於天性然亦多宗閭立本惜世罕有知者因見此卷為表而出之

李侯丹青勝結綠貝闕珠宮看不足偶研丹碧寫青山
萬壑千峰僅盈幅應知深處有神仙
花落花開度歲年
扁舟自是尋真侶為覓桃源一洞天

題馮文仲畫山水

元 鄭 東

六月涼風吹板扉
蒼苔生滿釣魚磯
人生抵死貪微祿
如此溪山不肯歸

為馮文仲畫山水小幅

元倪瓚

知君近住西湖曲
湖水淪漣似輞川
窗下青松高百尺
時時落雪滿琴弦

題馮文仲山水二首

元鄭元祐

峰巒入眼最關情
便欲移家向杳冥
不道有人先占去
三間茅屋一間亭

平溪如鏡碧潺潺風度漁船過柳灣此景眼前都可辦
却來畫裏看青山

文仲小幅山水

明沈周

竄雲古樹鬱蒼蒼墮碧危巒落手傍記得西湖樓上立
好山多在贊公房

馮文仲畫

明陳繼儒

雲宜看遍水宜聽除却圖中苦未寧好使京塵昏夢覺
且教長對隔窗屏

袁君庭玉以所藏何思敬山水圖求題為賦長句

元戴良

有客訪我城東廬手持何侯山水圖乍向高堂一披覩
已知筆力天下無老我愛山兼愛畫對此心神忽俱化
得非鼓柁過瀟湘無乃支藤上嵩華野亭倒影浸江清
耳邊髣髴波濤聲漁子蒼茫泛舟入林翁偃僂渡橋行
因憶良工繹思處元氣淋漓滿毫素豈但胸藏萬丘壑
西極南溟隨指顧驅山走海何雄哉滿堂空翠揮不開

丹丘赤城意繇邈蓬萊弱水情沿洄何侯天機深丹青
世無敵自從揮灑近天顏林下何曾見真迹年來喪亂
走風塵始為賢豪下筆親王吳未可誇神逸閻公致譽
安足真與客傳觀歡未止却歎何侯今已矣卷圖還客
休重看世間夢境亦如此

題何監丞畫山水歌

元戴良

至正以來畫山水祕監何侯擅其美帝御宣文數召見
抽毫幾動天顏喜有時詔許閱內儲名筆班班世所無

王吳李范已心識餘者山堆皆手摹海內畫工亦無數
才似何侯豈多遇權門貴戚虛左迎往往高堂起煙霧
人間一筆不可得門外車徒漫如織葉君使還親集送
乘興始肯留真迹于時在座總儒冠王鄭歌辭晚更妍
豈無片語道離恨見侯之畫筆盡捐此畫攜歸在鄉縣
萬壑千巖眼中見却憶都門送別時回頭瞥覩西山面
莫言短幅僅盈咫遠勢固當論萬里既似山河月裏明
復同衡霍牖中起葉君眼力老愈光愛之不減雲錦章

年來行橐盡拋棄，惟將此紙什襲藏。
何侯遷官定何處，有客披圖正傾慕。
北騎南轅儻相值，煩君為我致毫素。
請侯一寫滄洲趣。

題柯敬仲畫

五首

元虞集

北苑今仍在，南宮奈老何。
青山解浮動，端為白雲多。
雨過黃陵廟，蒼梧雲正愁。
何時倚虛幌，對此滿林秋。
江上秋漠漠，風雨晚蕭蕭。
千載誰相識，惟應待老樵。
峽口春雲重，江南夜雨多。
水深桃葉渡，風急竹枝歌。

平陸蒼龍起近山生遠煙前邨三萬頃明月水平田

題柯丹邱畫

元 郊 韶

溪上青山石徑紆暖雲晴嶂錦糝糊行人如隔湘江岸
日暮青林啼鷓鴣

為高安何思恭題方壺所畫山水

元 劉永之

古象山中白晝閒紫煙樓觀鳳笙寒試分玉井三秋露
戲寫方壺九疊山老樹糝糊常帶雨茅茨瀟灑鎮臨湍
知君隱處渾如此持向荷峰錦水看

方方壺畫

二首

元吳鎮

城市山林孰是非幽居能與世塵違
函關紫氣青牛到遼海秋風白鶴歸
天鼓叩殘明月墮洞簫吹徹彩雲飛
誰知寂寞江天外長使人間望少微

數載飄蓬事已非荆關咫尺世情違
寒雲時向青山抹野艇遙從白社歸
幾處夕陽人共語一邨流水鷺邊飛
知君紫府歸來後閒把丹青翫翠微

題方壺畫

為斯貞姪賦

明鎰炳

巨然畫與書法同縱筆所至生秋風墨飛元氣瀉沆瀣
青摩斗角連崆峒遠岫平林斷還續苔根斜迸山泉綠
釣倚丹楓野老磯門垂碧柳幽人屋壺公騎鯨白雲鄉
壟樹綠泣煙草黃風流文采今寂寞對畫淚痕沾我裳

題方壺畫

明
王 燧

紫府深沈白晝閑仙人歸去邈難攀當時暫謫來塵世
寫遍江南雨後山

題上清方壺山水

明
陳 輝

曾過蓬島訪茅君路入中峰紫翠分琪樹寒生雙磝雨
石門秋臥半潭雲捲簾山色當牕見拂軫溪聲入坐聞
何日暫辭塵服累青松白鶴日為羣

方方壺畫

明文徵明

煙沉密樹蒼山暝波捲長空白鳥迴細雨斜風簑笠具
釣翁何事却歸來

題方方壺畫

明僧大圭

方壺老人年九十醉把金壺傾墨汁染得蓬萊左股青

烟霧空濛樹猶濕危橋過客徐徐行白石下見溪流清
仙家樓館在何處雲中髣髴聞雞聲古臺蒼蒼煙景暮
藥草春深滿山路招取吹笙兩玉童我欲凌風從此去
題趙彥徵畫

元錢惟善

玉堂學士研猶存三絕名家尚有孫何處有山如此畫
便將歸計問田園

題趙彥徵畫

明張簡

吳興佳山水遠近蓄清光
名堯金蓋峰秀色獨蒼蒼
煙

雲互出沒草木生風香長橋接迴溪積石倚崇岡樵漁
識徑幽於以樂深藏擊鮮列鯉魴啟翳理松篁晨雨況
可鉏春泉亦堪湘既已長孫子所願安是鄉嗟哉風塵
中何由得徜徉趙君鍾神秀揮灑發奇章卷圖思舊游
掩抑不能忘

趙彥徵畫

明宋杞

遠山入空青老樹擎寸碧近山接平坡鑿鑿見白石兩
山盡處岐路平松林漠漠煙如織清溪疑自天目來鷗

鷺飛起無纖埃有人曳杖過溪去渡頭古屋誰為開玉
堂學士畫家趣瀟灑文孫傳筆意風塵滿眼何處避安
得向此山中住

題趙彥徵溪山小景圖

明僧來復

曾汎苕溪看晚霧紅簾小艇穩於車水通孤岸橋依竹
路入重林屋傍花風外眠鷗驚客笛雲中吠犬隔仙家
秋波千頃芙蓉老誰覓王孫舊釣槎

趙彥榮臨畫

元郊韶

北苑南宮奈老何
青山依舊洛中多
相思一夜鷗波夢
棹子船頭結綠蓑

彥敬小景

明張寧

陰陰綠樹草堂低
曉雨初晴水滿溪
門逕晝長人不到
百花深處一鶯啼

題彥顥畫中小景

二首

明聶大年

水禽沙鳥自相呼
遠近雲山半有無
一葉扁舟兩三客
載將煙雨過西湖

雨餘芳樹淨無塵
草色蒙茸淺帶春
茆屋石田應尚遠
夕陽愁殺獨歸人

為祝彥中題山水圖

明劉基

高軒玲瓏不受暑
半幅輕綃宿煙雨
白屋素壁生空明
似聞水聲繞庭宇
松髯拂天藤蔓垂
枯根瘦石相因依
寒濤不驚虎兕卧
嵐翠欲與蛟龍飛
空江悠悠一漁艇
水白沙明羣魚靜
武陵桃花何處尋
落日微風片帆影

為彥中題畫

明龔詡

青山之青如佛頭白雲化作寒泉流世間塵土飛不到
眼中景物俱清幽若人自是好靜者豈非五柳先生儔
每托琴樽寫高興脫屣樂從魚鳥遊却笑時人苦不達
漏盡鳴鐘猶未休君不見小虞塘西玉峰下一卷已遂
吾菟裘共論心事肯相過斗酒當為山妻謀

題丁生所藏錢舜舉山水

元龔璚

寒溪深無魚扁舟小如屐舉世相為浮更用一篙力畫
彼山中人憩此松下石

題錢舜舉山水小景

明薛瑄

琪樹秋風生早寒，樓臺縹緲暮雲間。
橋頭有客長無事，閒聽溪聲靜看山。

題吳季良所藏戴文進山水

明程敏政

丹青價重錢塘戴，一幅湖山寫更工。
高閣倚空凌夜斗，長橋分水架晴虹。
勝遊地接呼猿洞，舊隱人思放鶴翁。
髣髴畫船春載酒，綠陰啼鳥路西東。

題戴文進山水圖

明陳璽

疊巘層巒曲曲灣中有罅地非人間幽人靜觀適忘形
輒向陰厓結茅亭亭前山色青可續亭下溪流瑩如玉
邀朋終日話綢繆藐視乾坤真一粟老樹號風出林杪
浮雲飛盡青螺小曲欄干外少人行對面長空落飛鳥
輕衫細葛暑不知萬象覺來清悄悄正是南華誦罷時
呼童埽葉烹新葵噫嘻此圖誰所為云是戴氏無聲詩
戴氏山水稱絕奇筆端造化婉王維謫仙孫子如我期
便欲跨鶴臨清漪

戴文進小幅

明 祝允明

峭壁遙撐落照危
蜿蜒曲隴繞脩陂
前頭徑轉峰回境
說與時人定不知

次陸太宰全卿題戴文進畫卷

明 王世貞

朝出錦官城暮投浣花渡
步步花媚人那能舍花去
但使有酒沽不妨花下住

吳偉江山圖歌

明 何景明

吳偉老死不可見
人間畫史空嗟羨
吾觀此卷江山圖

飄然意象臨虛無想當濡毫拂絹素酒酣落筆神骨露

萬里青天動海嶽空堂白日流雲霧洲傾岸側波嶺銜
島嶼倒影翻源潭江邊萬舸一時發中流颭颭開風帆
崩濤湧浪勢難久漁子舟人各回首去鴈遙知七澤中
落花誤認三江口煙峰蒼茫貌二叟面髮衣冠頗麤醜
石林沙草恣點染舒卷滄洲在吾手憶昨弘治間偉藝
實絕倫供奉曾逢萬乘主招邀數過諸侯門京師豪貴
競迎致失意往往遭訶嗔由來能事負性氣輒軻貧賤

終其身嗚呼吳生不復得剩水殘山轉悽惻此卷流傳
天地間我即見汝真顏色

吳偉畫

明嚴嵩

郭熙之死誰復同湖湘小仙今代雄慣將健筆寫縑素
江山平遠稱尤工洞庭瀟湘渺何許積水長天迷處所
沙邊老樹總呼風波上輕雲初散雨短棹扁舟競往還
垂綸者翁意愈閒晴牕展翫心眼亂興在滄洲千里間

題文徵明畫

明陸深

筆下塵埃一點無開圖知是賀家湖秋風九月菰蒲岸
橫著溪舟看浴鳬阿明此藝稱獨步前身妙絕元姓顧
安得置之水晶宮臥看雲煙落毫素

題文徵仲小景

明鄭鵬

竹橋橫小澗泉響落空山惟有幽棲客扁舟恣往還

題石田畫

二首為
楊仲深作

明邊貢

夕陽半落羣峰高古林萋迷猿正號欲招同人眺野色
安得揚州何水曹近煙蒼蒼遠煙白此時獨作邗西客

君不見石子岡頭蘿薜深麋鹿成群詎相識

平生不識石田子往往相逢畫圖裏世傳百本無一真
抹青塗紫俱門人秋堂對此雙眼豁倏然置我溪與壑
君不聞畫家貴意不貴工只在冥冥漠漠中

題石田翁贈朱守拙小景

明陳蒙

野藤刺水竹籬斜落盡東風枳殼花日午不聞茶臼響
春城買藥未還家

題倣石田大幅

明李日華

石流寒映目溪樹密垂陰赤日不到地清風時汎襟好
句忽衝口故人俄上心久虛洞庭約理棹待秋深

為楊起同題沈石田擬謝雪村山水

明吳寬

雪邨已逝知幾年妙畫曾向吳中傳少時看畫老能憶
此事還輸沈石田昨者西閭楊給事乘興放舟過湘川
坐間偶及雪邨畫為言楊謝世有連石田呼童急展絹
冉冉水石兼雲煙兩山秀色相對峙長松落澗聲隨泉

禿翁觀泉不歸去，豈是磻底尋詩篇。
石田作畫不賣錢，給事得之真有緣。
墨痕斷爛稱古蹟，莫上米家書畫船。
為陳玉汝題啟南山水大幅

明吳寬

馬家作畫纔一角，剩水殘山氣蕭索。
畫苑馳名直至今，輸與毫端不浮弱。
此幅壯哉誰寫真，吳西山水見全身。
行春橋上曾遙望，待樂亭中好細論。

為史明古題沈啓南畫

明吳寬

岑律終南山，黃河抱其趾。
舊聞塞天地，延袤幾千里。
陽

烏浴虞淵落霞散如綺層巒藹佳氣蒼翠不可擬史君
松陵彥家世昔居此夜夢或見之既覺心亦喜老南慰
茲圖歷歷宛相似不知經營勞但見丘壑美赤松真吾
師白雲是知己為報山中人明年泝江水

題唐子畏山水圖

明顧璘

赤城霞氣連東海九疑縣縣舜陵在曾遊兩地縱奇觀
疊嶂填曾何礪硯洞庭波濤拍雲天吳江長橋絕可憐
扁舟夜攜二三子高歌月下招靈仙歸來草堂老無力

山水迢遙苦難得蘇臺居士好畫手一幅盡寫蒼茫色
林壑高深氣杳冥空潭颯颯水風生開簾對此坐清晝
髣髴邀余萬里行

唐寅畫山水歌

明祝允明

杜陵一疋好東絹韋郎上植松兩幹唐寅今如曹不興
有客乞染淞江綾前山如笑後如怒疎林如風密如霧
黯黯渾疑隔千里蜿蜒忽辨緣溪路黑雲沍蒼梧丹霞
標赤城壯哉畫工力九州通尺屏兩崖遠立觜兩角一

道空江浸寥廓吳綾本是淞水剪誰把溜澠辨清濁茅
齋傍江絕低小羨爾高居長自好今年吳地幾魚鼈看
畫轉覺心熱惱黃金壺中一斗汁我欲濡毫映手濕莫
教童子誤攘翻忽使癡龍攜雨出

題羅汝文畫山水

明林誌

十里雲屏枕黛流史溪山水憶曾遊煙霞謾寄滄洲趣
萬壑春聲入棹謳

題元人畫

明鄭鵬

峰巒馳突如奔馬萬頃澄江練光瀉閒庭邃館掩清秋
嘉樹陰陰覆平野山椒寺隱見浮屠中流小艇懸輕蒲
桃源輞川無乃是興來欲往忘披圖



御定歷代題畫詩類卷十三



總校官庶吉士臣侍

朝

校對官編修臣裴

謙

騰錄監生臣范

栩

欽定四庫全書薈要

集部

御定歷代題畫詩類卷十四

欽定四庫全書薈要

御定歷代題畫詩類卷十四目錄

山水類

稽山道芬上人畫山水歌 唐顧況

范山人畫山水歌 唐顧況

睦上人畫水 唐方干

觀項信水墨 唐方干

題段吉先小景 宋晁補之三首



題四弟以道橫軸畫 宋晁補之

題許道寧畫 宋陳與義

題俞子清侍郎惠畫 宋王炎二首

題刪定姪畫卷 宋孫覲二首

奉題李彥中所藏俞侯墨戲 宋朱子

題可老所藏徐明叔畫卷 宋朱子二首

題王仲信畫水石橫幅 宋陸游

跋尤延之山水兩軸 宋楊萬里

題周忘機畫軸 宋王庭珪

題解生山水圖 宋劉宰

題姚雪蓬使君所藏蘇野塘畫 宋戴復古

題老梧畫卷 宋裘萬頃

題歐陽氏山水後 宋白玉蟾

子端山水同裕之賦 金李純甫

跋賈天升所藏段志寧山水 金高永

跋邪律浩然山水卷 元元好問

秀隱君山水 元元好問

題楊司農宅劉伯熙畫山水圖 元趙孟頫

題龔聖予山水圖 元趙孟頫二首

蕭照江山圖 元袁桷

題危功遠山水 元袁桷

題道士山水畫 元馬祖常

題簡天碧畫山水 元馬祖常

題趙虛一山水圖 元貢奎

試院中戲題姚檢校山水圖 元范梈

題馬虛中畫 元黃潛

孫伯大山水圖 元傅若金

為袁清容長幅 元黃公望

題馬道士畫 元陳旅二首

題韓伯清所藏郭天錫畫 元陳旅

題王戢隱畫山水 元張翥

題江陰丘丈中山水圖 元貢師泰

題應中立所藏陳元昭山水 元納新

題李遵道山水 元丁復

陳生山水圖 元吳師道

謝氏友山圖 元吳師道二首

玉澗禪師山水 元吳師道

題段應奉山水圖 元余闕

為方厓畫山就題 元倪瓚

吳仲圭山水 元倪瓚

題金華余山人山水

元劉永之

趙善長山水

元王逢

題天遊畫

元華幼武

為北邙湯同知題畫卷

元馬臻二首

題從子倫畫山水

元于立

題王景南山水圖

元張天英

題李州銘所藏毛澤民山水

元陶宗儀

為寶林衍上人題山水圖

明劉基

題徐君美山水圖

明張以寧

題余仲揚畫山水圖

明劉崧

題孫子讓山水

明劉承直

題王佐山人畫

明林弼

題王廷珪畫

明林弼

題陳生畫

明高啟

題張校理畫

明高啟

劉松年畫

明高啟

題黃鶴山人畫

明高啟

題陸有孚山水圖

明王褒

題馬自牧水墨山水

明王恭

題高漫士山水圖

明王恭

題吳德暘山水小景

明藍仁

題陳惟允所畫山水小幀

明張適

題王孟端山水

明俞貞木

題馮進士養質山水畫

明李勝原

題俞仲剛山水

明周致堯

曾瑞卿所作山水圖

明凌雲翰

欽定四庫全書薈要卷一萬九千一百二十二

集部

御定歷代題畫詩類卷十四

山水類

稽山道芬上人畫山水歌

唐顧況

鏡湖

一作中

真僧白道芬不服朱審李將軍墨汁平鋪洞

庭水筆頭點出蒼梧雲且看八月十五夜月下看山盡
是畫

范山人畫山水歌

唐顧況

山崢嶸水泓澄漫漫汗汗一筆耕一草一木棲

一作淒

神

明忽如空中有物物中有聲復如遠道望鄉客夢遶山
川身不行

睦上人畫水

唐方干

毫末用功成一水水源山脈固難尋逡巡便可興波浪
咫尺不能見淺深但有片雲生海口終無明月在潭心
我來擬學磻溪叟白首釣璜非陸沉

觀項信水墨

唐方干

險峭雖從筆下成，精能皆自意中生。
倚雲孤檜知無朽，挂壁高泉似有聲。
轉扇驚波連岫動，迴燈落日向山明。
少年師祖今過祖，異域應傳項信名。

題段吉先小景

三首

宋晁補之

慘澹天雲欲雨低，秋山人靜鳥聲稀。
似聞谷響飛黃葉，恐有孫登半嶺歸。

人生何事踏塵埃，閒處胸襟足自開。
不作終南養高價，小山幽桂好歸來。

碧天無際日悠悠風靜沙平不見洲彭浪磯邊亦如此
危峰獨木繫扁舟

題四弟以道橫軸畫

宋晁補之

黃葉滿青山枯蒲靜寒水鳬鴈下坡睜牛羊散墟里擔
穫莫來歸兒迎婦窺籬虎頭無骨相田野有餘思

題許道寧畫

宋陳與義

滿眼長江水蒼然何郡山向來萬里意今在一窻間衆
木俱含晚孤雲遂不還此中有佳句吟斷不相關

題俞子清侍郎惠畫

二首

宋王炎

筆端元有畫中詩
寫出三語一段奇
追憶舊遊如昨日
艤舟細看中興碑

一去星沙二十年
夢魂時到橘洲邊
從今不起征南念
移得湘山在目前

題刪定姪畫卷

二首

宋孫覲

筆下鑿開渾沌眼
中見此崔嵬海上神
黿負出天邊靈鷲
飛來

水邊兩鵠語時山下一牛鳴地蒼梧翠竹森然長與閒
雲臥起

奉題李彥中所藏俞侯墨戲

宋朱子

不是曾中飽丘壑誰能筆下吐雲煙故應祇有王摩詰
解寫離騷極目天

題可老所藏徐明叔畫卷

二首

宋朱子

羣峰相接連斷處秋雲起雲起山更深咫尺愁千里
流雲繞空山絕壁上蒼翠應有採芝人相期煙雨外

題王仲信畫水石橫幅

宋陸游

王郎書逼楊風子畫亦憑陵蜀雨孫豈是天公憎絕藝
一生憔悴向衡門

跋尤延之山水兩軸

宋楊萬里

水際蘆青荷葉黃霜前木落蓼花香漁舟去盡天將夕
雪色飛來鷺一行

題周忘機畫

舊聞周忘機隱於浮圖如洪
覺範之流然未見其畫也

宋

王庭珪

羅浮飛瀑落九天尺素倒流三峽泉怪底晴窻起風雨
洞庭野色瀟湘煙平生江山入吾手況有對坐南昌仙
不須作此無聲畫妙畫自以無聲傳

題解生山水圖

宋劉宰

長江之水西南來江北江南圖畫開君從何處得此景
錦帆似泛長江回槎牙老樹連荒島雨雨人家出林杪
鷗飛欲下洲渚寬雲橫不斷關山杳圖窮雙嶼金焦峙
仙宮縹緲浮寒水拖樓換轉吳波平閭闔中天日月明

題姚雪篷使君所藏蘇野塘畫

宋戴復古

高者為山坳者為壑為煙為雲渺沙漠漠水鳥樹林人
家聚落騎者何之舟者未泊三尺紙上萬象交錯天機
自然神驚鬼愕嗚呼此吾故人野塘蘇元龍之墨迹中
有石屏老淚痕又與野塘添一筆

題老梧畫卷

宋袁萬頃

吏隱三年楚水頭每隨鳬鴈棹扁舟歸來喜色驚鄰里
分得瀟湘一片秋

題歐陽氏山水後

宋 白玉蟾

平沙斷岸幾千尺樹色煙光渺無極一葉扁舟歸去來
漁翁放棹倚蘆荻八九山家雲水邨白蘋紅蓼數漁舫
沙寒石瘦木葉落一鉤淡月照黃昏小橋跨水碧溪淺
蒼壁丹崖半苔蘚樵子歸擔竹兩竿落霞孤鷺天邊遠
千山萬山風色清四柱茅亭立晚汀花紅草綠山水靜
獨步亭前秋月明山前一陣梧桐雨落花驚斷山禽語
誰家樓閣隱青林老僧歸寺立溪許一溪流水遶雲根

草舍茅菴常閉門客來倚棹一回顧直疑此是真桃源
洞門紫翠交相映林幄山屏更清勝何人作此無聲詩
展開如入溪山境

子端山水同裕之賦

金李純甫

遼鶴歸來萬事空人間無地著詩翁只留海嶽樓中景
長在經營慘澹中

跋賈天升所藏段志寧山水

金高永

蒼壁雲氣湧長松風雨寒湍流壁山出玉虹飲溪灣胸

中無雲夢筆底無江山想見破墨初布袖蛟龍蟠壯觀
駭心魄萬象本自閒寒齋靜相對遠意空追攀

跋邪律浩然山水卷

元
元好問

六月三泉松桂寒西風早晚送歸鞍無因料理黃塵了
只得青山紙上看

秀隱君山水

元
元好問

烏鞵踏破軟紅塵未信溪山下筆親圖上風煙看瀟灑
畫家亦有衛夫人

題楊司農宅劉伯熙畫山水圖

元趙孟頫

移得山川勝坐來煙霧空
窗中列遠岫堂上見青楓
巖樹參差綠林花掩冉紅
鳥飛天路迴人去野橋通
邨晚留遲日樓高納快風
琴尊會仙侶几杖從兒童
疑聽孫登嘯將無顧愷同
微茫看不足瀟灑興難窮
碧瓦開蓮宇丹樓聳竹宮
亂泉鳴石上孤嶼出江中
藉甚丹青譽益知書畫功
煩渠添釣艇著我一漁翁

題龔聖予山水圖

二首

元趙孟頫

澤雉樊中神不王白鷗波上夢相親黃塵沒馬歸來晚
只有西山小慰人

當年我亦畫雲山雲白山青咫尺間今日看山還自笑
白頭輸與楚龔閑

蕭照江山圖

元
袁 桷

蕭郎解作湖山圖上皇一見玉色愉明知此景落歌舞
別灑妙墨為訐謨長江吐吞恨無極突兀金鼇障西北
雞鳴不聞中夜起零落烽臺候朝夕蒙衝揚帆去如仰

遙望青徐在吾掌諸公坐談籌畫疏年年送使瓜州上
輪囷米舟踰沔水驕將高眠載吳妓卷蘆吹笛斜陽愁
折筮投江等兒戲只今承平五十年蜀荆賈客船相聯
瑩篴傳歌賽神舞不信人間有今古

題危功遠山水

元表桷

雲作糝糊冰作稜玉峰深鎖鐵峻嶒欲問先天觀前路
釣叟捲篷終不應

題道士山水畫

元馬祖常

江翻墨瀋漬冰絲白日沉沉暝靄姿鶴影照雲星度竹
猿聲裂石澗流澌千林雨暗歸人急萬里天長去鳥遲
咫尺東南山水國仙翁曾約種靈芝

題簡天碧畫山水

元馬祖常

西江隱君簡天碧醉來畫水復畫石春山秋樹綠更紅
木橋野屋橫且直烟雲蓊鬱風雨交元氣淋漓障猶濕
雪蓬夜宿魚尾舫晴蓑曉掛牛角帙岷關巫峽冬氣清
猿啼鳥嘯天一尺老來看畫眼苦澁便擬買田溪水側

脫去賜帶繫芒履著書五車刻苔壁

題趙虛一山水圖

元貢奎

我愛青山欲歸去偶見生綃喜還住層巒疊嶂遠冥濛
旭日東生光采注簾陰微閃數枝丹疑是巖前半開樹
晴嵐曉翠千萬重一覽底須攜杖屨郭生十年不相見
筆意從容入天趣青田道人如瘦鶴能跨生駒窮海嶽
何如挂此素壁間終日焚香相對閒政爾胸中有丘壑
烏帽紅塵漫飄泊向來山中我醉眠白雲孤飛興悠然

清幽到處畫不出自遣數語人間傳

試院中戲題姚檢校山水圖

元范梈

故園不涉已經秋何日徑辭黃鶴樓
卻借仙人綠拄杖乘風散上碧峰頭

題馬虛中畫

元黃潛

人在白雲處舟在清溪曲不聞欸乃聲
但見山水綠

孫伯大山水圖

元傅若金

齋居胡為見雲壑白日虛嵐滿秋幌
河水深蟠地底回

層崖險歷空中上蒼茫不知開闢始咫尺須論數千丈
林湍遠岫微有無巖畔精藍蔚蕭爽雜樹縣羅拂輕黛
寒松覆谷含清響仙源或在人間世洞口孤舟欲長往
嗟我平生最漂泊中年萬事何鞅掌憶昨征行多所經
至今絕境懷幽想雷霆半夜山忽至風雨三春石應長
對坐聊歌隱士芝無因一試仙人杖

為袁清容長幅

元黃公望

入山眺奇壑幽致探何窮一水青岑外千巖綺照中蕭

森凌雜樹燦爛映丹楓
有客茅茨裏居然隱者風

題馬道士畫

二首

元陳旅

道人江上寫春雲絕似房山高使君
綠樹青岑吞吐處
惱人晴絮白紛紛

江上羣山翠作堆
人家門檻對江開
小樓應有憑闌者
天遠歸帆似不來

題韓伯清所藏郭天錫畫

元陳旅

往年京口郭天錫
學得房山高使君
畫省歸來人事少

煙岑閒向客樓分
林扃暝落青楓雨
小郭寒生白蜃雲
歲晚懷人增感慨
晴牕展翫到斜曛

題王戡隱畫山水

元張翥

額黃銷盡玉嬋娟
翠袖凝愁倚暮煙
舊日漢宮三十六
更無秋露泣銅仙

題江陰丘丈中山水圖

元貢師泰

老龍渴飲池中墨
飛上半天成崩方
雲煙著地凝不開
白晝神驅太陰黑
筆端巧奪造化功
咫尺峰巒千萬重

長林似洒楓葉雨虛亭不動松花風隔江更有山無數
江上扁舟纔半渡他年白髮許重來為君別寫容城賦

題應中立所藏陳元昭山水

元納新

遠騎出郊坰裴徊立清曉風雨江上來雲山望中小松
瀑瀉巖阿僧鐘度林杪茲焉儻可棲長歌拾瑤草

題李遵道山水

元丁復

層峰高出雲樹外飛溜直下天河懸江南老客腸空斷
舊宅不歸三十年

陳生山水圖

元 吳師道

白雲從何來，縈紆截青嶂。
落落倚巖松，泫泫赴溪浪。
平林出茅屋，修梁亦相向。
如何寂無人，此境付空曠。
憶我秋雨餘，江南入遙望。

謝氏友山圖

二首

元 吳師道

逶迤漫相逐，偃蹇自難親。
之子與為友，此山能擇人。
幼輿山巖姿，安石丘壑情。
復見佳子弟，使人增眼明。

玉澗禪師山水

元 吳師道

玉澗詩多畫上題如何此畫不題詩依稀樹石皆遊戲
一筆全無却更奇

題段應奉山水圖

元余闕

水如剡溪水山似沃州山想見鱸魚美扁舟常不還

為方厓畫山就題

元倪瓚

摩詰畫山時見山不見畫松雪自纏絡飛鳥亦閒暇我
初學揮染見物皆畫似郊行及城遊物物歸畫筭為問
方厓師孰假孰為真墨池挹涓滴寓我無邊春

吳仲圭山水

元倪瓚

道人家住梅花邨
窻下松醪滿石尊
醉後揮毫寫山色
嵐霏雲氣淡無痕

題金華余山人山水

元劉永之

人言吳中山水好
坐使絕境那能到
金華山人懷故山
時拂冰紈寫幽島
贈君此圖更絕奇
妙墨精思奪天造
陂陀重阜隱喬木
偃仰遙汀帶文藻
石嶠雲生暮色微
海門潮落秋風早
賀監居臨鑑湖曲
子猷宅近山陰道

江清落日櫂船回
照水新袍影顛倒
高情千古摹前哲
世俗紛華豈堪保
經年烽火徧江南
萬壑千峰迹如埽
畸人奔走厭塵濁
試觀圖畫開懷抱
思傍幽林結茅屋
柴門低映寒藤老
放鶴前山戴笠歸
獨把長劒拾瑤草

趙善長山水

元王逢

畫師今趙原
東吳諒無雙
寸毫九鼎重
烏獲力靡扛
翠樹擁羽旗
深崦敞雲牕
參差見罍罍
不無酒盈缸
老山石黃色
插脚琉璃江
隱若赤壁壘
勢壓曹魏邦
何當柔

猛虎蛟鱷遂我降
欠伸列仙崖
嚏咳漁蠻砭

題天游畫

元華幼武

老龍駢駢隱雲間
揮灑翰墨心神閒
移來子真谷口樹
寫出米家江上山
峩峩翠巘遠能致
渺渺丹梯高可攀
白雲深處有仙子
為求大藥駐朱顏

為北村湯同知題畫卷

二首

元馬臻

山人慣識山中趣
來訪山家陟山路
轉頭萬事總不知
只有秋聲在高樹

黃塵浩浩眯人眼，怪石急流生野姿。
溪橋不放車馬過，山頭樓觀秋參差。

題從子倫畫山水

元于立

我本山中人，頗有愛山癖。
何人寫秋山，秀色如可食。
天河露下秋漢白，挹露磨空洗秋色。
炯如洞庭水浸青芙蓉，倒影天光湛空碧。
又如飛龍天外來，鱗鬣森森插霜戟。
遠嶼瀾茫隔煙浦，冷雲濕翠愁痕古。
便從海上訪三山，又恐征帆迷處所。
若邪溪在何處歸，去來山中住道。

逢仙人紫綺冠指點丹崖是征路寄書松竹問平安莫
嫌老子來遲莫

題王景南山水圖

元張天英

千年古樹立蒼石三峰兩峰天出雲青溪道士坐船上
自按玉簫人不聞

題李州銘所藏毛澤民山水

元陶宗儀

竹雪子能畫山醉來解衣盤礴羸筆力甚似荆與關版
甃橋西懵懂樹灰堆峰前鴨嘴灘夕霏翳壑氣晦靄春

瀑出澗聲潺湲遠岫離離斷復連湘娥綰結風前鬢若
非子真谷口宅定有太一玄都壇竹雪子玉筍班面帶
河朔氣態度美且嫺鳥跡印沙文錯落蝸涎行壁勢回
環物物本然具畫理妙處豈在鐫琢間脫略畦町埽邊
幅八法默契烏絲闌寸楮片縑亦可愛令人咫尺思躋
攀此圖忽落李君手時復把看多歡顏老余撫景感真
游清盟題詩卷送還

為寶林衍上人題山水圖

明劉基

雨過秋山日欲暝白雲如雪擁山根高松浥露和煙冷
迸水穿沙出谷渾擬向蘿陰緣石徑却尋花片入桃源
畫圖應有通神處他日相從子細吟

題徐君美山水圖

明張以寧

天雲慘澹江欲雨古木陰森精靈語春潮夜落富陽江
短篷曉繫蒼厓樹蓬間丈人清隱者傲視滄浪吟太古
蜚人捉魚貫楊柳沽酒欲歸沙店暮掀髯以手招其來
劃起沙汀數行鷺鷥飛不盡青天長漁舟散入蘆花霧

遠山近山無數青我恐斯人有新句酒船獨載西家施
玉手冰盤行雪縷酒酣竹弓抨野鴨笑調吳兒短蓑舞
開圖興發賦思歸山水東南美無度

題余仲揚畫山水圖

為余自
安賦

明劉崧

金華仙人余仲揚筆墨蕭疎開老蒼昨看新圖湖上宅
煙霧白日生高堂層峰上蟠石皜皜絕島下瞰江茫茫
長松並立各千丈間以灌木相低昂松下上人坐碧草
秋影忽落衣巾涼囊琴未發絃未奏已覺流水聲洋洋

赤城霞氣通鴈蕩巫峽雨色來瀟湘誰能千里坐致此
欲往久歎河無梁風塵漲天蔽吳楚六年悵望神慘傷
玄猿苦啼巖北樹白鴈不到江南鄉赭山焚林絕人迹
如此山水非尋常此圖本為自安寫亦感同姓悲殊方
幽軒素壁泉聲動對此令我心為狂何由捫蘿逐麋鹿
振衣直上雲中岡登臨一寫漂泊恨長嘯清風生八荒

題孫子讓山水

明劉承直

斜日在松杉千崖暝色酣山藏五柳宅路轉百花潭亂

石明蒼玉遙峰露碧簪終希陪妙躅來此脫征驂

題王佐山人畫

明林弼

山光雜空翠雲影澹晴暉古渡舟誰繫虛齋人未歸
苔秋雨積野樹晚風微便欲拋塵事垂綸柳外磯

題王廷珪畫

明林弼

秋色晴山迴煙光野水連空林輞川外古樹草堂前
天地留詩卷江湖老釣船美人隔雲漢對此思悠然

題陳生畫

明高啓

前村夕陽明後嶺秋嵐積葉落露山邨潮來沒江石遙
遙射鴈子慘慘聽猿客何事下征帆西陵渡頭驛

題張校理畫

明高啓

寒色初凝野秋聲忽在林遙山不能見祇為晚煙深

劉松年畫

明高啓

樵青刺篙勝搖槳船頭分流水聲響青山渺渺波漾漾
白鷗飛過時一兩載書百卷酒十壺日斜出遊女兒湖
鄰舟買得巨口鱸醉拍銅斗歌嗚嗚此樂除却江南無

題黃鶴山人畫

明高啓

何處畫相同湘南與峽東江來落日外山出杪秋中綠
桂騷人宅青蓮釋子宮鐘鳴樵谷暗船散市橋空風樹
驚猿落烟蕪去鳥通平生遊楚興對此轉無窮

題陸有孚山水圖

明王褒

遠山白雲裏近山青天上樓觀何巍峩金碧鬱相望石
塘照縈紆平林見空曠漫拂渡橋鞭且憩沿崖杖良時
趣自隨佳境意足暢奈此行期促丹梯當再訪

題馬自牧水墨山水

明王恭

鳥外懸蘿青幾峰
紅泉翠壁花蒙茸
人間不見問津者
林下空餘避世蹤
昨夜山中度涼雨
落木寒猿半牕曙
日夕天空鏡水深
不辨仙源在何處

題高漫士山水圖

明王恭

山郭雨新霽孤雲濕
猶飛嵐嶺隱空翠
石林閑清暉時
與同心人逍遙愛荆扉
都無浮世累
共我飯蕨薇
日夕笑分手微風拂蘿衣

題吳德暘山水小景

明藍仁

雲山分遠近水石助清幽
老眼看名畫深懷似故丘
草迷行鶴逕藤引釣魚舟
賣藥忘機者無人識伯休

題陳惟允所畫山水小幀

明張適

濟南那得似江南千頃溪
山百頃嵐三月綠陰桑子落
邨邨布穀老吳蠶

題王孟端山水

明俞貞木

喬木靄春霽野水浸平沙
山脊浮雲合巖腰細路斜
攜

琴向江寺沽酒到漁家歸去幽居晚山童埽落花

題馮進士養質山水畫

明李勝原

青山疊疊靜當戶長松挺挺凌煙雨數椽茅屋竹樹間
中有高人抱幽趣翠巖丹壑深幾重水遶人家隔秋浦
石巖突兀不可攀茫茫遠水難為渡瑤草琪花滿澗阿
彩霞瑞靄開林塢山中採藥人未還天桃穠李迷歸路
馮君抱負經濟才綠袍新著登天府奈何亦有丘壑情
持茲圖繪索余句披圖便覺逸思飄荏苒巾袍襲煙霧

山明水秀有如此恨不攜家此中住

題俞仲剛山水

明周致堯

我昔四明尋隱者著屐遠過玉几山巖扉苔徑轉森邃
結巢迺在雲松間松間迴風蕩空影水流花開春日永
芋服涼深團扇開好鳥飛來意俱靜為覓漁梁白沙步
因識樵人奕棋處扁舟暝泊碧溪陰
冷月長歌下山去束帶十年事朝謁鶴怨猿驚總淒切
草堂晴晝翫新圖三歎令人欲愁絕

曾瑞卿所作山水圖

明凌雲翰

山關迢遞野橋斜策杖幽尋豈憚賒路轉峰回連佛寺
雞鳴犬吠隔人家白雲作雨多如絮紅葉驚風少似花
不是褐夫能貌得空令泉石老煙霞

御定歷代題畫詩類卷十四